

Segun director di SVb Ir. Jacobs:

Fondo di pension di behes ta den recuperacion!

ORANJESTAD (AAN) -- Den un entrevista cu director di SVb, ir. Edwin Jacobs, Matutino DIARIO a puntr'e con ta siguiendo cu e fondo di pension di behes, AOV. Sr. Jacobs a indica cu e hustacionnan introduci na comienzo di 2014 y di 2015 ta dunando su frutanan y e fondo di AOV ta recuperando den linea cu e proyeccionnan haci pa SVb. Pa ilustra e recuperacion di e fondo y e efectonan di e ahustacionnan, director di SVb a repasa e cifranan disponible. "Na comienzo di 2014 a aumenta e prima di AOV cu 1%, mientras cu a adapta e premielongrens te cu 85 mil florin pa aña. E adaptacionnan aki a genera den 2014 28,9 miyon extra na prima pa e fondo di AOV/AWW. Pa loke ta e aña fiscal 2014, e entrada na prima tabata 3 miyon florin mas di loke SVb a proyecta pa 2014.



Tambe mester menciona cu durante 2014, Departamento di Impuesto a paga mesun restitution di prima cu e aña prome. Tur esaki nan a conduci na mas entrada neto pa e fondo di AOV. E entradanan extra aki a pone cu e deficit proyecta pa 2014 a keda reduci, cu e resultado cu mester a uza menos di e reservanan di

fondo". Sr. Jacobs a sigui muestra cu na comienzo di 2015 dos otro cambio a keda introduci den e sistema. "Primeramente e prima di AOV a keda aumenta cu 1%. Durante e prome cuater lunanan di 2015, e aumento di prima aki a resulta den 8,7 miyon florin extra na entrada di prima compara cu e prome

cuater lunanan di 2014. E otro cambio cu a keda introduci ta e aumento di edad di pension di 60 pa 60 aña y mei. Como consecuencia di e aumento aki, e cantidad di pensionadonan a bin ta disminuyendo desde februari di e aña aki. Na final di januari e cantidad di pensionadonan tabata di 20.941 y na comienzo di juni e cantidad aki a baha na 20.630. E bahada aki ta debi na e hecho cu durante e lunanan di februari te cu Juli, no ta drentando pensionado den e sistema, mientras cu di otro banda tin pensionado ta bando na e sistema pa motibo di fayecimento". Ir. Jacobs a subraya. "E resultado di e reduccion den cantidad di pensionado na final ta traduci su mes den reduccion di e payroll di pension tur luna. Desde februari ta constata cu e payroll en berdad a bin ta bahando, cu excepcion den luna di

juni, caminda pagonan atrasa a keda realiza", director di SVb a agrega. Segun sr. Jacobs e aña 2015 ta e aña crucial pa e fondo di AOV. SVb su proyeccionnan na 2013 a muestra, cu introduciendo e cambionan ya menciona, cu na 2015 e fondo lo a conoce un deficit den liquidez di un 8 miyon florin. Pero, mirando e desaroyonan positivo den e entradanan extra na 2014 y loke ta mustrand pa 2015, mas e reduccion den e payroll pa e aña aki, e proyeccionnan actual di SVb ta indica cu e fondo lo no conoce un deficit e aña aki. Pa conclui, director di SVb a indica cu si e desaroyo economico sigui manera proyecta, entrante 2016 e fondo di pension di behes AOV lo cuminsa forma reserva atrobe. Pues, e fondo di AOV ta den proceso di recuperacion y esaki ta canando den e bon direccion.